

Na osnovu člana 22 Statuta Brčko distrikta Bosne i Hercegovine (Službeni glasnik Brčko distrikta BiH – prečišćen tekst, broj 2/10), Skupština Brčko distrikta Bosne i Hercegovine, na __. redovnoj sjednici održanoj __. _____ . godine, u s v a j a

ZAKON O VOLONTIRANJU

Član 1.

(Predmet zakona)

- (1) Ovim zakonom definiše se volontiranje, podsticanje volontiranja, načela volontiranja, uslovi za obavljanje volonterske djelatnosti, način regulisanja međusobnih odnosa između volontera i organizatora volonterskih aktivnosti i druga pitanja od značaja za volontiranje.
- (2) Izrazi koji se u ovom zakonu koriste u muškom rodu obuhvataju iste izraze u ženskom rodu.

Član 2.

(Definicija volontiranja)

U smislu ovog zakona volontiranje je organizovano i dobrovoljno ulaganje vremena, znanja i vještina u cilju pružanje usluge ili obavljanje aktivnosti od opšteg ili zajedničkog interesa, ili za dobro drugog lica, bez isplate novčane naknade ili potraživanja druge imovinske koristi, osim ako ovim zakonom nije drukčije određeno.

Član 3.

(Promovisanje volontiranja)

Vlada Brčko distrikta Bosne i Hercegovine (BiH) javnim politikama promoviše volontiranje kao aktivnost od javnog interesa za Brčko Distrikt BiH i Bosnu i Hercegovinu koja doprinosi aktivnom uključivanju građana, a naročito mladih, u rješavanju socijalnih i drugih društvenih pitanja, doprinosi razvoju humanijeg društva jednakih mogućnosti i ukupnom poboljšanju kvaliteta života građana u Brčko Distriktu BiH.

Član 4.

(Volonter)

- (1) Volonter može biti domaće ili strano fizičko lice, u skladu sa zakonom.
- (2) Na strano fizičko lice-volontera shodno se primjenjuju propisi Bosne i Hercegovine o boravku stranaca i mjerodavni međunarodni ugovori.

Član 5.

(Organizator volontiranja)

- (1) Organizator volontiranja može biti:
 - a) udruženje i fondacija koje je upisano u registar udruženja i fondacija u Bosni i Hercegovini, a koje u cjelosti ili djelimično provodi svoje volonterske programe i projekte na teritoriji Brčko Distrikta BiH,
 - b) crkva i vjerska zajednica koja je priznata ili upisana u registar u Bosni i Hercegovini.

- c) organ vlasti i javna ustanova koja je osnovana saglasno propisima Brčko distrikta BiH.
- (2) Izuzetno od odredbi stava (1) ovog člana, organizator volontiranja može biti i privredno društvo koje djeluje na području Brčko distrikta BiH i javno preduzeće koje je osnovano saglasno propisima Brčko distrikta BiH, pod uslovom da volonterske aktivnosti obavljaju van svojih radnih prostorija, na osnovu programa volontiranja na koju prethodnu saglasnost daje organ nadležan za provođenje inspekcijskog nadzora nad primjenom ovog zakona.
- (3) Ovaj zakon primjenjuje se i na društvo Crvenog krsta-križa kao organizatora volontiranja u Brčko distriktu BiH, osim ako su odredbe ovog zakona u suprotnosti sa zakonom kojim se uređuje pravni status Crvenog krsta-križa Bosne i Hercegovine.

Član 6.

(Korisnik volontiranja)

Korisnik volontiranja može biti fizičko lice, organizator volontiranja, osim privrednog društva iz člana 5. stav (2), drugo udruženje ili fondacija, javna ustanova ili Brčko Distrikt BiH.

Član 7.

(Izuzete od volontiranja)

U smislu ovog zakona volontiranjem se ne smatra:

- a) stručno osposobljavanje i usavršavanje ili vrijeme provedeno na praktičnom radu bez zasnivanja radnog odnosa, u skladu sa zakonom,
- b) rad van radnog odnosa, u skladu sa zakonom,
- c) obavljanje usluga ili aktivnosti koje je jedno lice dužno da pruži drugom licu u skladu sa zakonom, drugim propisom i ugovorom, osim ugovora o volontiranju,
- d) izvršavanje sudskih presuda, prekršajnih naloga i drugih odluka nadležnih organa,
- e) obavljanje usluga ili aktivnosti koje su uobičajene u porodičnim, prijateljskim ili susjedskim odnosima,
- f) obavljanje poslova i aktivnosti u političkim strankama i drugim udruženjima koja djeluju u interesu svojih članova, u skladu sa statutom.

Član 8.

(Poseban odabir i obuka volontera)

Organizator volontiranja dužan je da posveti naročitu pažnju odabiru i obuci volontera u slučajevima kada su korisnici volontiranja:

- a) djeca,
- b) lica sa invaliditetom,
- c) lica sa teškoćama u razvoju,
- d) starim i nemoćnim licima i
- e) bolesnim licima ili licima koja su potpuno ili djelimično lišena radne sposobnosti.

Član 9.

(Lica koja ne mogu biti volonteri)

Volontiranje sa korisnicima iz člana 9. ovog zakona ne može da obavlja:

- a) lice kojem je izrečena mjera bezbjednosti obaveznog psihijatrijskog liječenja na slobodi ili obaveznog liječenja ovisnika ili zabrane vršenja poziva, djelatnosti i dužnosti, koja je u vezi sa djelatnošću volontiranja,

- b) pravosnažno osuđeno lice za krivično djelo protiv života i tijela, protiv sloboda i prava čovjeka, protiv braka i porodice, ili protiv zdravlja ljudi,
- c) lice koje je u potpunosti ili djelimično lišeno poslovne sposobnosti,
- d) lice koje je u potpunosti ili djelimično lišeno roditeljskog prava i lice prema kome su izrečene mjere zbog nasilja u porodici.

Član 10.

(Prava volontera)

(1) Volonter ima pravo:

- a) da mu se izda potvrda o volontiranju,
- b) da bude upoznat u pisanoj formi sa uslovima i vrstom usluga i aktivnosti koje će obavljati, eventualnim rizicima u obavljanju ovih usluga i aktivnosti, i pravima koja mu pripadaju na osnovu ovog zakona, drugih propisa i opštih akata organizatora volontiranja,
- c) da bude upoznat sa kodeksom ponašanja, odnosno etičkim pravilima ponašanja koja su propisana u djelatnostima u kojima se obavlja volontiranje,
- d) na odgovarajuće osposobljavanje, ako je takvo osposobljavanje potrebno za obavljanje volonterskih usluga i aktivnosti,
- e) na stručnu pomoć i podršku tokom volontiranja,
- f) na naknadu ugovorenih troškova nastalih u vezi sa volontiranjem, ako je odnos između volontera i organizatora volontiranja uređen ugovorom, i ako ugovor predviđa naknadu troškova nastalih u vezi sa volontiranjem,
- g) na bezbjedne uslove rada i sredstva i opremu za ličnu zaštitu, u skladu sa prirodom volonterskih usluga i aktivnosti koje obavlja,
- h) na zaštitu privatnosti i ličnih podataka,
- i) da bude konsultovan pri odlučivanju o načinu obavljanja volonterske usluge i aktivnosti.

(2) Prava volontera iz stava (1) ovog člana ujedno su obaveze organizatora volontiranja.

Član 11.

(Obaveze volontera)

(1) Volonter je obavezan da:

- a) volontira u skladu sa pravilima struke i uputstvima organizatora volontiranja,
- b) čuva povjerljive i lične podatke o organizatoru ili korisniku volontiranja,
- c) u slučaju opravdane spriječenosti ili namjere da prekine obavljanje volontiranja, pravovremeno informiše organizatora volontiranja,
- d) izvršava uputstva organizatora volontiranja, osim uputstva u vezi sa volontiranjem koja su nezakonita, opasna po život i zdravlje volontera, korisnika volonterskih usluga ili drugih fizičkih lica, opasna po imovinu lica, moralno i etički neprihvatljiva za volontera ili u suprotnosti sa ugovorom o volontiranju,

(2) U slučaju da izvršavanje uputstva može uzrokovati štetu volonteru, korisnicima volontiranja ili trećim licima, volonter je dužan da o tome upozori organizatora volontiranja.

(3) Volonter ne odgovara za prouzrokovanu štetu ako je prethodno upozorio organizatora volontiranja na okolnosti iz stava (2) ovog člana.

(4) Obaveze volontera iz stava (1) i (2) ovog člana ujedno su prava organizatora volontiranja.

Član 12.

(Troškovi volontiranja)

Ukoliko je ugovorena ili propisana zakonom, novčanom naknadom ili imovinskom koristi za volontera ne smatraju se naknade za sljedeće troškova nastale u vezi volontiranja:

- a) računom potvrđene novčane naknade za nabavku radne odjeće, opreme i predmeta za zaštitu potrebnih za volontiranje,
- b) računom potvrđene novčane naknade isplaćene u svrhu troškova putovanja, smještaja i ishrane koji nastanu u toku aktivnosti volontiranja,
- c) računom potvrđene novčane naknade isplaćene u svrhu troškova ishrane, zbrinjavanja i obuke životinje u vlasništvu volontera koja učestvuje u aktivnostima volontiranja,
- d) novčane naknade isplaćene u svrhu primanja medicinskih usluga i vakcina,
- e) novčane naknade isplaćene za troškove obuke potrebne za volontiranje,
- f) novčane naknade isplaćene za premije osiguranja volontera za slučaj smrti, fizičke povrede ili profesionalne bolesti tokom volontiranja, odnosno novčane naknade u svrhu osiguranja odgovornosti za štetu nastalu kod organizatora volontiranja ili trećeg lica,
- g) novčana naknada isplaćena za pribavljanje dokumenata ili plaćanje administrativnih taksi neophodnih za volontiranje, mjesečni troškovi ishrane i prevoza volontera u ukupnom iznosu do 30% od prosječne mjesečne neto plate zaposlenih u Brčko Distriktu BiH prema posljednjem zvaničnom podatku organa nadležnog za poslove statistike,
- h) isplaćeni novčani iznosi dobitnicima nagrade Brčko Distrikta BiH za volontiranje.

Član 13.

(Odnos između volontera i organizatora volontiranja)

- (1) Prava i obaveze između organizatora volontiranja i volontera uređuju se ovim zakonom, ugovorom o volontiranju, i primjenom opštih pravila obligacionog prava o naknadi štete.
- (2) Organizator volontiranja odgovara za štetu koju volonter prouzrokuje korisnicima volontiranja ili trećim licima za vrijeme volontiranja po načelu objektivne odgovornosti, osim ako dokaže da su postojali razlozi koji isključuju njegovu odgovornost.
- (3) Organizator volontiranja koji je nadoknadio štetu korisniku volontiranja ili trećem licu ima pravo na naknadu štetu od volontera ako se dokaže da je volonter štetu prouzrokovao namjerno ili iz krajnje nepažnje.

Član 14.

(Evidentiranje)

- (1) Volontersko iskustvo i angažman evidentira se u potvrdi u volontiranju.
- (2) Sadržaj i izgled potvrde o volontiranju propisan je Aneksom 1, koji je sastavni dio ovog zakona.

Član 15.

(Nadzor nad provođenjem zakona)

- (1) Praćenje provođenja ovog zakona vrši Vlada Brčko distrikta BiH - Odjeljenje za stručne i administrativne poslove – Pododjeljenje za podršku MZ, UG i NVO.
- (2) Inspeksijski nadzor nad provođenjem ovog zakonva vrši Kancelarija gradonačelnika Brčko distrikta BiH - Inspektorat- Inspekcija rada.

Član 16.

(Novčane kazne)

(1) Novačanom kaznom od 300,00 KM do 1.500,00 KM kazniće se za prekršaj:

- a) privredno društvo ili javno preduzeće koje volonterske aktivnosti obavlja u svojim radnim prostorijama, ili koje volonterske aktivnosti obavlja bez prethodnu pisane saglasnosti nadležnog inspeksijskog organa (čl. 5. st. 2.).

- b) organizator volontiranja koji za obavljanje volonterskih aktivnosti angažuje: lice kojem je izrečena mera bezbjednosti obaveznog psihijatrijskog liječenja na slobodi ili obaveznog liječenja ovisnika ili zabrane vršenja poziva, djelatnosti i dužnosti, koja je u vezi sa djelatnošću volontiranja; pravosnažno osuđeno lice za krivično djelo protiv života i tijela, protiv sloboda i prava čovjeka, protiv braka i porodice, ili protiv zdravlja ljudi; lice koje je u potpunosti ili djelimično lišeno poslovne sposobnosti; lice koje je u potpunosti ili djelimično lišeno roditeljskog prava i lice prema kome su izrečene mjere zbog nasilja u porodici (čl. 9.).
- c) organizator volontiranja koji volonteru ne izda potvrdu o volontiranju, u roku od pet dana od dana kada je volonter, elektronskim putem, poštom ili lično, dostavio zahtjev za izdavanje potvrde o volontiranju (čl. 10. st. 1.)
- (2) Novčanom kaznom od 100,00 KM do 500,00 KM za prekršaj iz stava (1) ovog člana kazniće se i odgovorno lice organizatora volontiranja.

Član 17.

(Stupanje na snagu zakona)

Ovaj zakon stupa na snagu osmog dana od dana objavljivanja u Službenom glasniku Brčko Distrikta BiH.

Broj: 01-02-____/17

Brčko, __.__. 2017. godine

**PREDSJEDNIK
SKUPŠTINE BRČKO DISTRIKTA BiH
Esed Kadrić, s. r**

